
ЎЗА: Қирғизистон ва Тожикистон ёшлари тантанали кутиб олинди

ОНЛАЙН. Бугун Фарғона шаҳрида бошлангидан “Келажакни терроризмсиз қурамыз!” шиори остидаги халқаро фестивалнинг иштирокчилари – Тожикистоннинг Сўғд вилояти, Қирғизистоннинг Ўш, Жалолобод, Боткен вилоятларининг бир гуруҳ ёшлари чегара постларида тантанали кутиб олинди.

Давлатимиз раҳбари ташаббуси билан олиб борилаётган кенг қўламли ислохотлар бугун ўз самарасини бермоқда. Айниқса, қўшни давлатлар билан ўзаро ишонч ва дўстлик аънаналари асосида турли соҳаларда йўлга қўйилган алоқалар бунга катта замин ҳозирлади, десак муболаға бўлмайди. Ёшлар ўртасида бу каби фестивалларнинг ўтказилиши ҳам терроризм ва турли таҳдидларга биргаликда курашда муҳим аҳамият касб этади.

Фестивалга ташриф буюрган Қирғизистон Республикаси Боткен вилоятининг ёшлар делегацияси Фарғона туманидаги “Водил” чегара постида катта шодиёна билан кутиб олинди. Унда ёшлар, кенг жамоатчилик вакиллари иштирок этди.

Икки кун давом этадиган халқаро ёшлар фестивалида “Марказий Осиё минтақасида экстремизм ва терроризмга қарши курашнинг долзарб масалалари” мавзусида ўқув семинари ҳамда “Биз келажакни биргаликда бунёд этамыз” шиори остида ёш олимларнинг инновацион ғоялари, тадбиркор ва ҳунарманд ёшлар ишлаб чиқараётган маҳсулотлар кўргазмаси бўлиб ўтади. Шунингдек, фестиваль иштирокчиларидан иборат жамоалар ўртасида спортнинг мини-футбол, волейбол, стол тенниси мусобақалари ўтказилиб, “Дўстлик” кубоги ташкил этилади.

Фарғона шаҳридаги “Истиқлол” стадионида фестиваль иштирокчилари ва ёшлар учун концерт дастури намойиш этилади. Шунингдек, тадбир иштирокчиларини мустақиллик йилларида Фарғона шаҳрида амалга оширилган бунёдкорлик ишлари, тарихий обидалар билан таништириш мақсадида вилоятнинг диққатга сазовор жойларига саёҳат уюштирилади.

2019-03-11 11:28:17